



**ODRŽANA DESETA SJEDNICA ODBORA ZA ODNOSE SA LOKALNOM
ZAJEDNICOM**

U sali Općine Vareš, 26.07.2022. godine, kompanija Eastern Mining održala je desetu po redu sjednicu Odbora za odnose sa lokalnom zajednicom (PLC). Dnevni red sjednice započeo je usvajanjem Zapisnika i Zaključka sa prethodne tj. devete (IX) sjednice PLC-a. Posebnost ove sjednice očituje se u tome što je ovo zadnja sjednica u ovom sastavu. Predstavnici kompanije Eastern Mining zahvalili su se svim članovima Odbora za odnose sa lokalnom zajednicom što su u prethodne dvije godine pratili razvoj projekta, bili podrška kompaniji te održavali transparentan odnos sa zajednicama koje su predstavljali.



"INICIJATIVA ODRŽIVOG RAZVOJA LOKALNE ZAJEDNICE" U ORGANIZACIJI KOMPANIJE EASTERN MINING

Dana 18.07.2022. godine kompanije Eastern Mining u suradnji sa Općinom Vareš organizovala je događaj pod nazivom „Inicijativa za održivi razvoj lokalne zajednice“. Svrha događaja je privući potencijalne investitore, ali i potaknuti zainteresirane građane za pokretanje malih i srednjih biznisa u Varešu. Događaju su prisustvovali općinski načelnik, gđin. Zdravko Marošević, predstavnici fondacija Mozaik i Impakt, te stručni suradnik Biroa rada Vareš. Ispred kompanije Eastern Mining, Lejla Karčić, menadžerica za usklađenost i Vildana Mahmutović, šef odjela za održivost, održale su prezentacije kojima su istakle usluge koje nedostaju u Varešu, a koje bi bile od velikog značaja. Po završetku događaja, predstavnici fondacija Impakt i Mozaik predstavili su svoje programe koje bi ponudili novim, ali i već postojećim biznisima. Na događaju su učestvovala i udruženja žena koja djeluju na ovom području: Udruženje žena „Zvijezda“ Vareš, Udruženje „Žene Stupnog Dola“, Forum žena Pogar te Izvorno Vareško, koja su imala priliku promovirati svoj rad i proizvode.





BESPLATAN KURS ENGLESKOG JEZIKA U ORGANIZACIJI FONDACIJE

ADRIATIC

Fondacija Adriatic je u aprilu 2022. godine otvorila Poziv za besplatan kurs engleskog jezika za sve zainteresovane stanovnike općine Vareš te je u toku trajanja Poziva zaprimljeno 227 prijava. Rukovodstvo Fondacije Adriatic je angažovalo školu jezika Facultas Cambridge Centar Sarajevo čiji profesori od 1.6.2022. godine predaju engleski jezik u prostorijama MSŠ „Nordbat-2“ Vareš, koja je partner Fondacije na ovom projektu. Kurs će za polaznike A1/A2 nivoa trajati 4 mjeseca, dok će za polaznike B1/B2 trajati 6 mjeseci. Čast nam je i zadovoljstvo biti podrška lokalnoj zajednici za promicanje i unapređivanje edukativnog sadržaja za sve generacije.

INTERVJU SA JOSIPOM KLARIĆEM

Želim da Vam se zahvalim na Vašem izdvojenom vremenu i tome što ćete govoriti za naš Eastern Mining bilten i blog, a koji je u sklopu projekta „Living History Project“. Za početak recite nam nešto više o sebi?

Zovem se Josip Klarić. Imam 75 godina. Trenutno živim u Zvijezdi, naselje Šimin Potok. Vareš me vezao i tu sam ostao. Zapitam se da li me je Zvijezda zarobila ili sam ja zaljubljenik Zvijezde. Putovao sam po svijetu, ali jednostavno nisam mogao nigdje ostati, rodni kraj me zvao nazad. Trenutno sam umirovljenik. Imam malo imanje gdje ljeti radim, a zimi otvorim ski-lift i družim se s posjetiocima.

Šta je bio Vaš prvi posao?

Po zanimanju sam ekonomista za turizam i ugostiteljstvo. Svojevremeno sam bio upravitelj odmarališta, hotela. Moj prvi posao bi je na mjestu direktora hotela Ponikve, koji je sada nažalost uništen i koji još nije obnovljen. Zatim sam radio u Željezari gdje sam vodio odmaralište u Srebrenom kod Dubrovnika. Nakon 3 godine uspješnog posla, shvatio sam da je ugostiteljstvo moj poziv. Vodeći se time, otvorio sam, tada prvi u Varešu, ugostiteljski objekat pod imenom „Stari Podrum“, a to je danas restoran „Stari Dani“.

Možete li napraviti poređenje života kako je bilo prije, a kako sada u Varešu?

Tu imam mali problem jer prije sam ja imao te godine, a sada ove. Kada je čovjek mlad, sve je uredno, sve je dobro. Međutim sad je taj odmak veliki i u odnosu na ono vrijeme sada je prazno u Varešu. Prije recimo kroz Zvijezdu je u Vareš dolazilo 5 autobusa punih radnika, a sada ni kombi nije pun. Grad je bio pun mladosti, pun svega, pun perspektive. Međutim, vrijeme je svoje donijelo.

Koliki je značaj da se turizam u Varešu podigne na neki veći nivo?

Ja sam možda prvi sa ovog područja koji je imao neke stvarne ideje sa turizmom i koji je završio odgovarajuću školu. Višu školu za turizam i ugostiteljstvo sam završio u Banja Luci, a zatim sam treću godinu upisao u Opatiji. U međuvremenu sam se oženio, pokrenuo vlastiti biznis, nažalost napustio fakultet, novac je bio glavni. Dobro se zarađivalo, ali uvijek je ostalo u meni da se u Varešu nekako pokrene i razvije turizam. Vareš je bilo jedno od prvih mjesta gdje se počeo razvijati seoski turizam. Da bi se turizam razvio treba dovesti čovjeka, treba ga ugostiti, pružiti mu ugodaj i pozvati ga opet. Ako mu sve od navedenog omogućite, on će se sigurno vratiti. Vareš osim rudnih bogatstava koja se spominju u posljednje vrijeme u Borovici, ima još jedno zlato, a to je zeleno zlato. To je priroda, vareška priroda, vareški ljudi, vareška okolina.

Da li ste upoznati sa projektom rudarenja na području lokaliteta Rupica i Veovača?

Jesam, od početka pratim razvoj projekta. Mogu Vam reći da sam prošle godine vodio dvije grupe, jedna iz Italije, druga ovdje domaća, da im pokažem to područje Borovice. Jer Borovica je izuzetno zanimljiv kraj koji je u sastavu starog grada Bobovca i srednjovjekovne države Bosne. Međutim ja sam poveo jednu grupu na jedan lokalitet, na jednom jalovištu gdje smo našli puno otpada pirita. Pirit zbog svojih sjajnih površina sliči dosta zlatu, bilo ih je zanimljivo gledati kako se raduju „zlatu“. Zanimljivo će biti pratiti razvoj projekta.

Šta mislite da li će i kakav će uticaj imati otvaranje novog rudnika na turizam i samim tim na Vaš posao na području Vareša?

Kad je to u pitanju, prostor Vareša je sačinjen od dosta brda i dolina. Vareš je sačinjen od dosta mikro-turističkih lokacija i na ovom području zbog te konfiguracije, šuma i visokih brda, ruderstvo i turizam mogu se razvijati paralelno. I do sada je bio rudnik željezne rude, ali brda sklanjanju pogled, ne dozvoljavaju prašinu i buku.



Kako Vi vidite Vareš nakon otvaranja rudnika odnosno kakva budućnost čeka Vareš po Vašem mišljenju?

Rudnik će vezati radnike ovdje, ti radnici će vezati svoju obitelj, svoju djecu. Tim radnicima u osim onog osnovnog zanimanja u rudniku treba odmor. E sad taj odmor treba iskoristiti na ovom području koja mi imamo. Imamo planinu Zvijezdu, imamo turistička odredišta na Zvijezdi. Rudnik je vrlo blizu starog grada Bobovca. Borovica je zanimljivo turističko mjesto. Tu su u blizini i lovački dom Igrista, ugostiteljski objekat Mrestilište koji je izuzetno posjećen, sela Pogar i Borovica, Sjenokos. S toga mislim da pored osnovne djelatnosti odnosno rudarenja, mogao bi da se razvije i turizam. Jer ako ovdje bude radilo par stotina radnika, oni su zauzeti 8 – 10 sati zauzeti rudnikom, oni moraju svoje slobodno vrijeme da potroše na odmor, rekreaciju, zabavu. Do nas je u Varešu, kako ćemo to iskoristiti. Turizam zahtijeva par stvari, a to su: dobro popiti, dobro pojest, dobro se zabaviti, čuti priču o tom mjestu u kojem se nalazite i doživjeti život u tom mjestu. Kad se ti elementi zadovolje, turizam je uspješan. Vareš kad bi se malo uozbiljio i krenuo primjerom Eastern Mining-a, pa doveo ljudi koji znaju kako se radi i kako se razvija turizam, onda bi mogao imati velike koristi od toga.

Smatrate li da će Vareš doživjeti svoj ponovni procvat kakav je imao u nekom prošlosti?

Jako je teško dostići ondašnji procvat Vareša, zbog same strukture i broja stanovništva. Ali mislim da te cifre i ne treba dostizati, moje mišljenje je da treba sačuvati ono što je ostalo. Krajevi su opustili, ali opet kad gledam po pitanju turizma, mogli bi se ovdje privući ljudi gradnjom vikendica, turističkih objekata, ponudom sadržaja, jer mi smo izuzetno blizu Sarajeva, aerodroma, a Sarajevo je izvoriste svih potencijalnih korisnika ovog područja, a Vareš se nalazi u zlatnom turističkom prstenu oko Sarajeva.

Za kraj našeg razgovora da li imate neku poruku za mlade ljudе našeg Vareša?

Smrt je ostala iza nas. Uperimo pogled u budućnost, a budućnost ste vi, naša djeca, rasuta po svijetu. Imamo Zvijezdu, kuće, njive, struju, vodu, telefon, cestu, rodni kraj. Hajde da nešto uradimo zajedno. Mi stari smo na čekanju, polako odlazimo, a na vama je da ovaj zemaljski rad ne opustoši, da ga ne nasele drugi ljudi. Svako od vas neka uređuje svoje imanje onako kako ste vidjeli u svijetu gdje sada živate, svako od vas radi nešto svoje, a svi zajedno stvaramo jednu ugodnu i privlačnu cjelinu. Boravak u ovome svome kraju moguć je i ljeti i zimi. Dođite i odmorite se. Povedite svoje prijatelje. Pokažite svijetu ko ste i odakle ste. To je moja poruka mladima ovoga kraja.